



Sa Natzione

Littera aperta a sos soberanistas Sardos

Aprile 2008.

Di Tzuanne Frantziscu Pintore

Perdonade su neologismu, neologismu pro sa cultura politica sarda, ma "soveranismu" mi paret a gradu de si pesare che a su logus in uve si podent addoviare sos sardos chi oe sunt partzidos in federalistas, sardistas, natzionalistas, indipendentistas e autonomistas. Paràula, custa chi oe est de su pagu prus o mancu, ma chi at unu sentidu culturale forte meda, abutinadu dae genias dirigentes chi - aiat naradu Mao - ant bentuladu sa pandela sarda pro mòvere contra a sa Sardigna.

Sa soberania est e podet èssere su rivu a oe ghetant totu sos trainos, de pustis chi unos ant dassadu carchi cosa in caminu e àteros s'ant tragiadu in fatu àtera cosa. Foras de sa paristòria, soberania non bastat a chi cheret s'istadu sardu indipendente, bastat a chie pessat chi s'indipendèntzia est unu deretu istòricu de su pòpulu sardu ma no est a sas bistas, est su chi bi cheret pro chie no est indipendentista ma cussiderat s'autogovernu prenu de sa nazione sarda s'essida mègius dae sa subalternidade de sa Sardigna.

A chie si reconnoschet in unu progetu soberanista, est una parte manna, si non sa maioria, de sos sardos. Craru, in custas botatziones governativas de su 13 de aprile, su prus de custos sardos s'ant a partzire comente chi siant italianos: chie a destra, chie a tzentru destra, chie a tzentru, chie a manca. E una parte ant a pònnere fatu a sa "anomalia" sarda, botende a sos partzidos natzionalistas chi nessi unu resurtadu ant a bastare: singulare chi su zogu no est su matessi de Itàlia.

Andent comente ant a andare, sas botatziones de su mese ch'intrat pertocant su Parlamentu italianu in uve sos parlamentares sardos - e sos italianos istrangiados in listas sardas, tantu pro mustrare chie cumandat - ant a contare pagu o nudda, su 27 pro milli.

Ma dae s'incras b'at una nazione de governare. E s'at a pesare, che a semper, sa chistione manna: est possibile de cuntivigiare unu programa de soberania de sa Sardigna, o est mègius isettare chi su sentidu organigiadu de s'indipendèntzia bastet su 51 pro chentu? Deo pesso chi non est chi siat possibile, est pretzisu. Tenimus fèminas e òmines chi sunt a gradu de pònnere cun sa genia sarda custa iscummissa. No est naradu, a dolu mannu, chi b'apat finas su coràgiu de lu fàghere, dassende a un'ala corgiolos ideològicos, de àteru istràngios, e bistende a sa sustàntzia de unu programma: sa costituzione de sa nazione sarda, su manìgiu autònomu de su patrimoniu culturale sardu pro fraigare prosperidade, manìgiu de s'economia pro liberare sa capatzidade de sos sardos de crèschere... e gasi e gasi: unu programma si faghet cunfrontende ideas similes, no uguales.

Or. Marzo 2008.

[U.R.N. Sardinnya Online](http://www.urn-sardinnya.com)

www.urn-indipendentzia.com